

VENDIM
Nr. 126, datë 12.6.2025

AUTORIZIM I NDIHMËS SHTETËRORE “GRANTE PËR TË RINJTË NË MBËSHTETJE TË ZHVILLIMIT TË INICIATIVAVE EKONOMIKE LOKALE”

Komisioni i Ndhmës Shtetërore me pjesëmarrjen e:

- Z. Blendi Gonxhja kryetar;
- Znj. Mimoza Dhëmbi anëtare;
- Z. Besnik Çina anëtar;
- Znj. Keida Qirko anëtare;
- Z. Ahmet Maqcellari anëtar,

Në mbledhjen e tij të radhës të datës 12.6.2025, në Ministrinë e Ekonomisë, Kulturës dhe Inovacionit, në bazë të ligjit nr. 9374, datë 21.4.2005, “Për ndihmën shtetërore”, i ndryshuar, mori në shqyrtim njoftimin e skemës së ndihmës shtetërore të njoftuar nga Bashkia Durrës mbi mbështetjen me grante nga buxheti i Bashkisë Durrës për të rinjtë e moshës 18–30 vjeç krijimin e mundësive për zhvillimin e ideve të biznesit të vogël dhe të mesëm.

I. Procedura

1. Bashkia Durrës, me shkresën nr. 1975, datë 7.2.2025, ka njoftuar skemën e ndihmës shtetërore “Grante për të rinjtë në mbështetje të zhvillimit të incentivave ekonomike lokale”. Në bazë të nenit 20, të ligjit nr. 9374, datë 21.4.2005, “Për ndihmën shtetërore”, të ndryshuar, Komisioni i Ndhmës Shtetërore vlerëson skemën e ndihmës shtetërore, në bazë të planit të ndihmës shtetërore të sipërpërmendur.

II. Përshkrimi i masës

2. *Qëllimi*: Mbështetja e planeve të qëndrueshme të biznesit të krijuara nga të rinjtë e qytetit të Durrësit për krijimin ose zgjerimin e aktivitetit të bizneseve ekzistuese.

3. *Baza ligjore e planit të ndihmës*: Plani i ndihmës shtetërore mbështetet në vendimin e Këshillit Bashkiak Durrës nr. 115, datë 24.12.2024, “Për miratimin e Programit Buxhetor Afatmesëm 2025–2027 dhe detajimin e buxhetit të Bashkisë Durrës për vitin 2025 dhe programin buxhetor afatmesëm 2025–2027”.

4. *Kohëzgjatja*: Skema e ndihmës do të zbatohet në periudhën 2025–2027.

5. *Dhënësi i ndihmës dhe autoriteti përgjegjës për zbatimin e masës*: Bashkia Durrës.

6. *Përfituesit*: Përfitues janë të gjithë të rinjtë të cilët pas procesit të aplikimit janë fitues dhe do të mbështeten bazuar në idetë më të mira, inovative, fitimprurëse dhe që garantojnë rezultate të qëndrueshme. e NMVM-të, duke iu nënshtuar një procesi të ndarë në tri faza:

7. *Shtrirja sektoriale dhe territoriale*: Projekti do të zbatohet në territorin e Bashkisë Durrës.

8. *Forma dhe vlera e ndihmës*: Buxheti i skemës në formën e grantit është 4,000,000 lekë. Përfitues të skemës do të jenë deri në 10 të rinj sipërmarrës.

III. Vlerësimi i ekzistencës së ndihmës shtetërore

9. Komisioni i Ndhmës Shtetërore vlerëson nëse plani i ndihmës shtetërore përbën ndihmë shtetërore në kuptim të nenit 4, pika 1, e ligjit nr. 9374, datë 21.4.2005, “Për ndihmën shtetërore”, të ndryshuar, pra nëse plani ofron një avantazh ekonomik për ndërmarrje, të cilat kanë një ndikim të mundshëm në konkurrencë dhe tregtinë midis shteteve anëtare, që nuk do të ishte përfutur në kushte normale të tregut.

10. Neni 4, pika 1, e ligjit nr. 9374, datë 21.4.2005, “Për ndihmën shtetërore”, i ndryshuar, përcakton se:

“Përveç rasteve të parashikuara ndryshe në këtë ligj, ndalohet çdo ndihmë e dhënë nga burimet shtetërore, në çfarëdoq formë e cila, në mënyrë të drejtpërdrejtë ose të tërthortë, shtrembëron ose kërcënon të shtrembërojë konkurrencën duke dhënë përparësi për një ose disa ndërmarrje të caktuara, ose për prodhimin e produkteve të caktuara, për aq sa mund të ketë ndikim në plotësimin e detyrimeve të ndërmarrja nga Republika e Shqipërisë në marrëveshjet ndërkombëtare që përmbajnë dispozita të ndihmës shtetërore”.

11. Gjithashtu, neni 71 “Konkurrenca dhe dispozita të tjera ekonomike”, i Marrëveshjes së stabilizim-asociimit ndërmjet Komuniteteve Evropiane e shteteve të tyre anëtare dhe Republikës së Shqipërisë,¹ përcakton se:

“Praktikat në kundërshtim me këtë nen vlerësohen në bazë të kriterëve që lindin nga zbatimi i rregullave të konkurrencës të aplikueshme në Komunitet, sidomos në nenet 81, 82, 86 dhe 87 të Traktatit themelues të Komunitetit Evropian dhe instrumenteve interpretuese që përdoren nga institucionet e Komunitetit.”.

12. Ligji i ndihmës shtetërore zbatohet vetëm për masat që plotësojnë të gjitha kriteret e përmendura në nenin 4, pika 1, konkretisht: a) burime shtetërore; b) avantazhi ekonomik; c) përzgjedhja; dhe d) efekti në konkurrencë dhe treg.

13. Plan i ndihmës i miratuar në buxhetin e Bashkisë Durrës financohet nga buxheti i miratuar për Bashkinë Durrës nëpërmjet instrumentit të grantit për të rinjtë me ide biznesi në një vlerë të caktuar nga dhënësi i ndihmës. Nëpërmjet transferimit të burimeve shtetërore në formën e grantit të drejtpërdrejtë, Bashkia Durrës i ofron të rinjve sipërmarrës/përfituesve një avantazh, duke i lehtësuar mbi mbulimin e shpenzimeve që normalisht do të duhet të përballonin me fonde të veta përgjatë aktivitetit ekonomik. Ndihma jepet vetëm për të rinjtë që do të jenë fitues nga procesi i përzgjedhjes së aplikantëve me idetë më të mira dhe garantojnë qëndrueshmërinë e biznesit. Skema ka potencialin të mbulojë pothuajse të gjithë sektorët e ekonomisë në territorin e Bashkisë Durrës, përfshirë ndërmarrjet që janë aktive në tregtinë rajonale/ndërkombëtare me ndikim në shtrembërimin ose kërcënimin për të shtrembëruar konkurrencën.

Në këto kushte, Komisioni vlerëson se, në bazë të nenit 4, të ligjit nr. 9374, datë 21.4.2005, “Për ndihmën shtetërore”, i ndryshuar, plani i ndihmës është ndihmë shtetërore, e cila është e ndaluar përveç rasteve të parashikuara ndryshe në këtë ligj.

IV. Vlerësimi i përputhshmërisë së skemës

14. Komisioni i Ndihmës Shtetërore vlerëson skemën e njoftuar në përputhje me nenin 8, të ligjit nr. 9374/2005, “Për ndihmën shtetërore”, i ndryshuar, i cili parashikon:

“Ndihma “De minimis” është e lejueshme nëse, pavarësisht nga forma ose qëllimi për të cilin i jepet një ndërmarrjeje, nuk kalon vlerën maksimale për një aktivitet të caktuar, për një periudhë financiare prej tre vjetësh.”.

Mbështetur në kreun II, të vendimit të Këshillit të Ministrave nr. 605, datë 31.8.2016, “Për përcaktimin e vlerës maksimale, të kushteve dhe të procedurës për dhënien e ndihmës “De minimis”, vlera maksimale e lejuar e ndihmës, si dhe kushtet për autorizimin e ndihmës përcaktohet si vijon:

1. Ndihma lejohet nëse përmbushen, njëherësh, të gjitha kushtet e mëposhtme:

a) vlera totale e ndihmës dhënë një ndërmarrjeje të vetme nuk i kalon 14.000.000 (katërmbeëdhjetë milionë) lekë, për një periudhë financiare prej tre vjetësh, e llogaritur në përputhje me kushtet dhe parimet e parashtruara në kreun 3 të këtij vendimi;

b) ndihma është transparente, nëse ekuivalenti bruto i grantit (EBG) mund të llogaritet me saktësi para dhënies së ndihmës, pa pasur nevojë të kryhet një vlerësim risku për konkurrencën, në përputhje me kërkesat dhe parimet e parashtruara në kreun 4 të këtij vendimi.

Në kreun III “Llogaritja e ekuivalentit bruto të grantit”, të VKM-së nr. 605, datë 31.8.2016, përcaktohet se: “1 .Granti dhe subvencionin në të holla janë ndihmë transparente”.

Sa më sipër, bazuar në ligjin nr. 9374, datë 21.4.2005, “Për ndihmën shtetërore”, i ndryshuar, dhe VKM-n nr. 605/2016, ndihma “De minimis” lejohet, nëse përmbushen kushtet e mëposhtme:

a) vlera totale e ndihmës dhënë një ndërmarrjeje nuk i kalon 14.000.000 (katërmbeëdhjetë milionë) lekë, për një periudhë financiare prej tre vjetësh. Ky kusht plotësohet duke qenë se buxheti vjetor i skemës është 4, 000, 000 lekë.

b) Ndihma duhet të jepet për një periudhë financiare prej tre vjetësh. Kohëzgjatja e skemës, e cila është marrë në shqyrtim, është gjithsej tre vite, duke plotësuar këtë kusht ligjor. c) ndihma është transparente. Ky kusht plotësohet sepse ndihma jepet në formën e grantit.

¹ Ligji nr. 9590, datë 27.7.2006, “Për ratifikimin e Marrëveshjes së stabilizim-asociimit ndërmjet Republikës së Shqipërisë dhe Komuniteteve Evropiane e shteteve të tyre anëtare”.

Sa më lart, Komisioni vlerëson se plani i ndihmës shtetërore është i lejueshëm, në përputhje me nenin 8, të ligjit nr. 9374, datë 21.4.2005, “Për ndihmën shtetërore”, të ndryshuar.

PËR KËTO ARSYE:

Komisioni i Ndhmës Shtetërore, në bazë të neneve 4, 8, 22, dhe 31, të ligjit nr. 9374, datë 21.4.2005, “Për ndihmën shtetërore”, të ndryshuar,

VENDOSI:

1. Të autorizojë skemën e ndihmës shtetërore në formën e grantit “Grante për të rinjtë në mbështetje të zhvillimit të iniciativave ekonomike lokale”, të miratuar me vendimin e Këshillit Bashkiak Durrës nr. 115, datë 24.12.2024, “Për miratimin e Programit Buxhetor Afatmesëm 2025–2027 dhe detajimin e buxhetit të Bashkisë Durrës për vitin 2025, dhe programin buxhetor afatmesëm 2025–2027”.

2. Çdo përfitues i ndihmës duhet të nënshkruaj deklaratën e ndihmës “*De minimis*” dhe të dorëzoj një kopje të deklaratës pranë Bashkisë Durrës. Vlera totale e ndihmës së dhënë një ndërmarrjeje nuk duhet të kalojë 14.000.000 (*katërmëdhjetë milionë*) lekë, për një periudhë financiare prej tre vjetësh.

3. Bashkia Durrës, brenda datës 31 mars të çdo viti, të paraqesë raport për impaktin e ndihmës shtetërore gjatë vitit paraardhës financiar. Raportet e zbatimit duhet të përmbajnë informacion të detajuar mbi shpenzimet e bëra dhe produktet e arritura.

4. Të gjitha të dhënat për zbatimin e skemës të ruhen deri në dhjetë vjet, pasi ndihma e fundit individuale të jetë dhënë në kuadër të kësaj skeme.

5. Ky vendim të botohet në Fletoren Zyrtare.

KOMISIONI I NDIHMËS SHTETËRORE

Kryetar: Blendi Gonxhja

Anëtarë: Mimoza Dhëmbi, Besnik Çina, Keida Qirko, Ahmet Maçellari